

大清會典
兵部



大清會典卷之

兵部

武庫清吏司

兵籍



凡八旗親軍前鋒鳥槍護軍於護軍驍騎步軍

教養兵壯丁內拔補護軍於驍騎步軍教養兵

壯丁內拔補驍騎於步軍教養兵正身壯丁內

拔補步軍於正身壯丁及開戶家人內拔補教

養兵於正身幼丁及別注冊人內拔補領催於

驍騎護軍內選充均由叅領佐領選應補之人



呈都統統領等簡覈錄其材力驍勇者既入伍
令各旗籍其名按季報部以時稽其盈絀○駐
防兵由該管官於駐防壯丁及開戶壯丁內拔
補自駐防後開戶者不準拔補若駐防官子弟有嫻習騎射
願於任所充伍者聽

凡直省考拔營兵以人材強壯技藝優嫻者充
補騎兵拔於步戰兵步戰兵拔於守兵守兵拔
於餘丁無餘丁乃募於民督撫提鎮本標及相
近營汛均親考拔餘令副叅考拔仍於巡閱屬
營時覆覈考拔失實及虛占名糧者論如法○

營兵令五人聯名具保互相覺察其有不遵約
束生事擾民容姦保憑離次失伍及凡有干紀
律之事均論如法並坐其長



